

四庫全書

史部

# 欽定四庫全書

史部

王端毅奏議卷六

詳校官侍講學士臣法武善

編修臣裴謙履勘

總校官進士臣繆琪

校對官中書臣葉葵

謄錄貢生臣李函圖

欽定四庫全書

王端毅奏議卷六

明 王恕 撰

復叅贊機務

轉南京兵部尚書叅贊機務謝恩疏

臣向蒙聖恩以兵部尚書兼都察院左副都御史巡撫南直隸成化二十年五月十九日欽奉本月初七日勅諭改臣南京兵部尚書叅贊機務者臣孤忠少與他技非長罄竭一得之愚巡撫五年之久惓惓屢陳未遂歸

休之願焦勞方切忽承簡擢之恩俾掌夏官仍叅留務  
矧南京乃祖宗根本之地尚書實古昔納言之官雅宜  
妙選奇才詎料仍推衰朽顧難回於成命肯少負於初  
心爰茲瀝血以輸誠終擬鞠躬而盡瘁除望闕謝恩到  
任管事外具本專差指揮石文通齎捧稱謝謹具奏聞  
督修孝陵查算工料數目奏狀

成化二十年五月十九日節該欽奉勅命臣同守備太  
監張本嚴督內外該管官員查勘實在用工官軍匠作毋

令空閒役占計算在官物料併價銀及支給錢糧毋令冒支妄費仍逐日併工修造早為完備欽此臣謹遵奉聖訓會同守備太監張本并內外守備官恭詣孝陵叩頭訖當同內外管工官太監鄭彊隆平侯張祐侍郎劉俊等徧歷工所看得孝陵殿宇門廡碑亭等項俱已裝修完備惟明樓已抓縛鷹架未曾拆修有鄭彊等說稱斗科已造成五十餘座因是原料明梁大楠木三根坐派四川布政司採辦南京工部已差營繕清吏司主事吳

湜前去催儼未到以此不敢拆卸又看得周圍牆垣除修完外止有一千七十丈未完臨及漿糲房牆垣損壞六十五丈未嘗修理各官說稱前牆係是原未計料之數臣等除行南京工部復差虞衡清吏司主事施恕馳驛前去著落四川布按二司官吏併行分巡分守官嚴督該府縣官吏委官量起人夫採打拽運及行四川巡撫都御史孫仁督發併工督令管工官將前項未修未完牆垣俱已修完完備於本年六月初五日疎放軍夫

匠作暫且歇工當將現在未用物料責令南京內官監  
監工內使張秀等并工部委官看守及今孝陵衛委差  
官軍輪流日夜巡綽行查前後修完工程用過物料役  
過軍匠支過工錢口糧并原派未到物料備細數目附  
卷欲候催儹楠木至日另行擇日興造明樓緣係奉勅  
令臣等併工修造早為完備事理未敢擅便今將各項  
總數開坐具本專差千戶姚鉞齋捧謹題請旨

論撥船事宜奏狀

車駕清吏司案呈奉本部送於內府抄出兵仗局署局  
事內官監左少監葉深先於成化十八年八月十八日  
欽蒙差臣等前往南京兵仗局成造盔甲等件除欽遵  
外照得所造盔甲擘手鐵袴等項俱係鋼鐵研明紵絲  
紬絹之物起運之時比與別項錢糧櫃扛至重所差船  
隻數少每遇河道灣淺一時難以動移又恐水氣侵尅  
以致發秀塵浥不便今後起運軍器之時合用馬快船  
隻合無照依各衙門事例每隻裝載十櫃等因奉聖旨



是該衙門知道欽此欽遵移咨到部送司案查成化十九年五月初十日該南京守備太監安寧等揭帖該兵仗局印信揭帖開報造完軍器四千五百件裝盛四百二十二櫃用船裝運本部照依節奉欽依事理委官會同南京科道等官看裝每船裝一十三櫃裝運到京交卸並無發秀塵浥續因裝運官物及進貢等項用船數多現在船隻不敷本部通行各衙門該運物件議擬則例具奏要將兵仗局軍器酌量可裝二十五櫃本年九

月二十八日兵部題奉聖旨都准擬欽此欽遵成化二十年正月內起運軍器七千二百件裝盛六百七十四櫃其管運官不肯照依本部奏准每船裝二十五櫃則例裝運每船止裝一十七櫃亦運到京交卸亦無發秀歷浥今本官又奏要照各衙門事例每船止裝十櫃查得南京工部起運上用餞金描金硃紅膳盒等件俱用黃羅銷金袂子黃絨繩索及櫃桶裝盛比與軍器櫃扛大小多半相等每船實裝六十餘扛近來內織染局起

運上用段疋每船亦裝一十三櫃別無每船止裝十櫃  
則例今却要每船裝十櫃委的近來欽取供用香料并  
木植等項用船動以百計工部該運儀真廠輒料合用  
馬快船二十隻一年二運今無一船可差況南京各衙  
門年例起運時鮮及應付欽差回京人員各處進貢方  
物等件用船數多實難措辦臣恕亦非不欲其喜而欲  
其怒但差多船少不勾撥用豈得已也如蒙合無仍照  
本部照奉欽依事理將前項軍器每船裝二十五櫃及

卷六  
各衙門一應起運物料俱照節該奏准儘船裝載事例  
及議擬則例而行不許管運人員自定扛數多討船隻  
煩瀆聖聽如此庶得事體歸一船隻殼差而裏河軍民  
拽船之勞亦可寬矣

陳言山陝救荒奏狀

臣伏聞邇來禮部題稱陝西山西山東河南北直隸灾  
傷查得成化二十二年例該各處僧道關給度牒合無  
令其就彼納米給與等因奉聖旨是僧道官有缺亦著

納米選用還酌量則例來說欽此又聞鎮守湖廣太監  
章貴等稱山西陝西河南北直隸地方荒旱饑民南流  
數多日有萬口經過欲照例驅治又恐激變欲發倉廩  
賑濟官糧有限合無通行山西陝西河南北直隸巡撫  
都御史督令各該州縣將新舊流民令該管里老招撫  
復業等因奉聖旨該衙門知道欽此又聞太子太傅吏  
部尚書兼華蓋殿大學士萬安等題稱邇聞陝西山西  
地方亢旱無收陝西尤甚人民缺食死者無算填滿溝

壑嬰孩路傍啼哭不絕合無將儒學生員不分地里遠近有納米者廩膳納米八十石增廣納米一百石俱赴陝西缺糧倉分上納本布政司起送國子監讀書挨次選用其軍民舍餘人等有願納米者授以軍職百戶納米二百石副千戶二百五十石正千戶三百石指揮照例加米定與衛分帶俸閒住俱赴陝西缺糧倉分上納具奏奉聖旨是該部知道欽此又聞差侍郎耿裕徐溥祭告西嶽西鎮西海大河之神臣有以見皇上與諸大

臣畏天憂民救荒恤患之心可謂無所不用其極雖雲漢之詩所謂旱既大甚散無友紀靡神不舉靡人不周者何以過之臣惟陝西山西地方連年灾傷米價貴甚閭閻小民貧難殷實者少雖奉上項恩例恐願納者寡焉能濟衆又訪得南直隸浙江江西湖廣今年頗收僧道生員軍民舍餘中間亦恐有願如恩例上納以圖補報者合無請勅每處差給事中御史郎中等官三二員分與府縣令其馳驛前去會同彼處巡撫巡按等官督

同分巡分守官分按詣屬出榜召募前項人等各照米數每石令其納銀一兩給與文憑關領度牒照缺選用入監讀書及為指揮千百戶等項其銀就令原差領勅官南直隸湖廣銀兩送陝西浙江銀兩送山西江西銀兩送河南俱公同巡撫巡按等官差委能幹司府官員分按詣屬給散缺食人戶隨銀多寡每月驗口或給二錢或三錢令其自行買米救濟其各處流民之在荆襄者彼處鎮守等官既稱不可驅治又稱無糧賑濟要令



各該巡撫都御史督令該管里老招撫復業緣里老亦多流移料無可差之人就彼有人可差各戶家業已失田野無望又無口食豈能回還臣思流民缺食無計聊生拊循失策必為盜賊勞師動衆所費益多合無將湖廣今年該起運南京各倉及兌軍秋糧量留一二十萬石運赴荆襄水次倉賑濟流民以銷後患又將河南該兌軍秋糧量留一二十萬石兌軍秋糧量留一二十萬石運赴荆襄水次倉賑濟流民以銷後患又將河南該兌軍秋糧量留一二十萬石

賑濟本處饑民及四方流來之民如河南兌軍糧米無  
徵亦須別作擘畫仍勅各處巡撫巡按提督三司委官  
如有流民到於該管地方即便加意調卹不許驅逐致  
令失所且人一日不再食則饑兩三日不食則病不能  
起五六日不食則死此救荒當如拯溺救焚可急而不  
可緩緩則無及矣臣深慮召募僧道生員人等銀兩急  
不能得有悞賑貸合無先出內帑銀二三十萬兩火速  
發去陝西山西河南賑濟如內帑不足請諭貴戚近臣

及在京巨富之家那移前去切不可緩待後召募有銀  
之日照數酌還仍乞降詔將被災府縣今年稅糧買辦  
等項盡行蠲免如此庶幾全活生靈潛消後患易危就  
安轉禍為福有以見皇上深仁厚德而有生之類蓋將  
感戴於無窮矣

救林俊張敞奏狀

臣恕荷國厚恩庸劣無補惟願聖德尊顯天下乂安俾  
臣得俯仰於無事之天沒齒於太平之日為幸大矣邇

間刑部主事林俊上章陳言忠誠激烈詞氣過直冒干  
天威謫官遠方後府經歷張黻為林俊陳情亦蒙挈問  
臣恕當以林俊等為戒括囊全身今復昧死而言者非  
納交於林俊等而為其游說也實為國家天下慮耳方  
今之時外而邊陲烽烟未靖軍士暴露內而郡縣旱荒  
太甚民饑而死此誠陛下憂勤惕勵詢謀羣策極力救  
濟以收人心之時奈何興土木之役為佛氏之居蓋聞  
僧伽之言張大佛法之功於以尊之崇之資其利益以

福斯民而延國祚也殊不知三代以前無佛法而帝王  
厯數率皆綿遠三代以後崇信佛法而帝王運祚未聞  
過之以此觀之佛法之無益於世也明矣其不足信也  
審矣且天地生成萬物祖宗創業垂統孔子明道立教  
其功其德豈佛氏所能髣髴萬一然而京師止設一壇  
以祀天地內府止設一太廟祀祖宗京都以及天下都  
邑亦各止設一文廟祀孔子就使佛法有靈而其功德  
可比隆於天地祖宗孔子其佛寺亦不宜多於天地祖

宗孔子之壇廟也今都城內外佛寺不知有幾千百區茲又欲營建佛寺於皇城之側遷移軍民數千百家計費帑藏銀數十萬兩似為過之然安土重遷人之情也今一旦拆人房屋使之遷於他處欲人心安得乎帑藏銀兩所以備兵荒也今乃以為建寺之資使民飛輓於道路轉死於溝壑欲人心悅得乎人皆知此事之非宜而不言獨林俊言之者是林俊能盡忠於陛下而不顧身家也人皆私議以為林俊之言是亦無一人公言於

朝獨張黻言之者是張黻亦能盡忠欲陛下納諫旌直以隆治道亦可嘉也今皆不之省而悉寘之於法此臣之所未喻也臣恐由是人皆以言為諱設有讒佞之害正姦邪之誤國誰復言之陛下何由以知之又造宮殿為梁為柱大楠木南京各殿已無一根近來修孝陵明樓差官前去四川徧歷山谷尋採五年僅得五根數內堪中者少不堪者多起動數千人夫止搜一根到於水次餘者尚未出山此等大木誠為難得不知在京各殿

現有堪作大梁大柱楠木幾多可穀幾座宮殿之用誠不可不愛惜以備用也陛下仁如帝堯孝同大舜自踐祚以來不畋獵不游幸未嘗妄興一旅之師亦未嘗妄戮一無辜之人誠不世出之明主大有為之聖君也不意偶然有此蓋未之思耳此臣之所以日夜懍懍而不能已於言也伏乞聖慈收雷電之威解恢恢之網復林俊等之職慰天下人之望暫停建寺之役專理兵荒之政如此庶幾遐荒向化九有歸心宗社可以鞏固天命



可以永保矣臣無任戰慄待罪之至成化二十年十一月十九日具題

定奪修城營葬工料奏狀

准工部咨營繕清吏司案呈奉本部送於工科抄出應天府府尹于冕等奏據上元等縣申據神泉等鄉里老葛再等呈照得南京外羅城週圍一百三十餘里城門一十七座比先年間原係工部委官驗工計料差撥人匠軍夫修理近年以來遇有城垣坍塌應天府與工部

分修現今各縣一年一次或二次起撥入夫多者一百  
四五十名少者六七十名每夫集價銀一兩動經七八  
百兩至一千餘兩及南京內官病故造墳安葬亦係民  
間撥夫集價逐年出辦負累人難况南京積年起運惜  
薪司光祿寺安王妃等處柴薪夫價光祿寺挑酒夫價  
竹籬扛索價并修理鮐魚廠內織染局攬缸煉灰價銀  
及現今內府成造段疋揀選香炷欵差內外官員往來  
日逐供給下程僉撥皂隸搬運柴薪挑送糧米等項并

手下役使厨役等類俱要供食一年之內出銀動以數千兩計以此科派繁重委的困苦無伸呈乞轉達將修城造墳二事量與寬減等因到府臣等看得外羅城所以環衛南京大城宗社宮闕之所在帑庫倉場之所積遇有坍塌損壞雖舉天下之工力修理亦不為過但本府所轄止是七縣內有江浦六合二縣係在江北里少民貧動輒移逃難以科差外惟有上元等五縣可以差撥加之地方連年旱澇相仍人民缺食困苦之極況外

羅城週圍里數闊遠城門不止一座南京工部原有湖廣江西福建三布政司所屬府州縣人匠工料數多原設有修倉主事一員就管修城專理其事今本府叢爾七縣連年與南京工部分工修理況本府亦無現在人匠俱是將價銀雇覓南京工部管下人匠用工修理委的事體未當合無今後將坐派本府修城夫價以十分為率本府出辦二分其八分灑派附近直隸蘇松常鎮太平徽州寧國安慶池州等九府照依府分人民多寡

出備大約一處集價不過銀六七十兩一年一次預先解送南京工部交納遇有城垣坍塌本部就委原管修城主事驗工計料一併修理如此則非但畿甸之民得以少寬抑且灑派不多外郡之民不致累負况南京工部連年得此工價不須別項勞費庶可經久常行其內官病故造墳一節緣內臣平昔俱曾効勞造墳之禮固不可廢但南京工部原無定例遇有坐派夫價工料等項往往多寡不一合無查照在京近年司禮監太監許

安御馬監太監劉永成等病故工部造墳安葬事例行  
移南京工部照例遵守施行借撥本府夫匠一槩停止  
庶不至於勞民傷財臣等竊惟南京乃祖宗根本重地  
上元等七縣皆京畿之民比之他處尤當時加愛養不  
宜日漸疲憊伏望聖明裁處乞勅該部將前項修城等  
事量為寬減處置以蘇民困以固邦本臣等職在養民  
昧死冒干天聽不勝恐懼待罪之至為此具本該通政  
使司官於奉天門奏奉聖旨該部知道欽此欽遵行據

順天府查得太監劉永成許安病故安葬事例本府應付棺材一具人夫二十名匠四名開報前來案呈到部叅照應天府所奏要將修城夫價以十分為率本府出辦二分其餘分派附近直隸蘇松等府出備及奏查安葬太監劉永成等則例以憑遵守一節緣係修理城垣安葬大臣俱係朝廷重務今本府所奏中間雖是有理但未經行勘難便定奪合咨貴職煩為查勘前項所奏務要斟酌停當徑自具奏以憑定奪等因備咨到職隨

行南京工部又行應天府查得南京外羅城垣先年遇有倒塌是南京工部委官驗工計料各衛差撥軍餘前赴該廠領料與班匠用工修理景泰六年蒙守備太監袁誠等奏行應天府著落上元江寧句容溧陽溧水五縣不為常例借倩人夫一百名分作二班相兼軍餘挑運木瓦等料匠作修理至成化九年本府府丞白昂見得牆垣經年不完夫役艱難備行內外守備等官會議得外羅城週圍一百六十里共一十六門遠近不等馴



象門起八門係應天府修理滄波門起八門係南京工部修理其該用工料南京工部與應天府各另出備兩不干預每年春秋二季內外守備等官公同南京工部并應天府官各照分修地方相看遇有損壞就行丈量料計修理及查得應天府每年修城有用工價銀二三百兩者亦有四五百兩者多寡不一叅照應天府奏要將夫價以十分為率本府出備二分其餘灑派附近直隸蘇松常鎮太平徽州寧國安慶池州等九府照依府

分人民多寡出備預先解送南京工部交納遇有城垣坍塌本部就委原管修城主事驗工計料一併修理一節緣南京工部與應天府分修外羅城垣係是內外守備官會同議允已行年久事理況於事體頗便難以更改及看得直隸蘇松常三府錢糧數多徽州安慶等府路程寫遠況各府俱有城池每年俱要起夫備料修理難令出備工價銀兩其鎮江寧國太平廣德與應天府州俱係原奉恩例減免錢糧去處又與南京相近太平

府蕪湖縣近來設有抽分場僉點夫役供應往來事頗繁重亦難出備若令鎮江寧國廣德三府州出備事頗相應及照內臣病故造墳安葬旣已查有前例別無定奪合無行令鎮江寧國并廣德三府州每年各出價銀六十兩俱解送應天府收修城垣其餘不足之數不分多寡俱令應天府上元等五縣出備仍照舊與南京工部各照原分地方城垣門座修理今後南京內臣病故合無照依太監劉永成許安事例安葬緣係二部咨臣

查勘所奏斟酌停當徑自具奏定奪事理俱未敢擅便  
具題

同南京吏部等衙門應詔陳言奏狀

臣等伏覩今年正月初七日欽降詔書有以見陛下敬  
天之渝卹民之困恐懼修省求言圖治之盛心也雖隆  
古聖明何以過之是以詔書到日誤罹刑辟者蒙更生  
之恩宿負錢糧者免追徵之苦如釋重負如解倒懸饑  
者得食勞者得息危者以安憂者以喜莫不願皇圖之

鞏固祝聖壽於萬年向非聖心惻隱詢謀屈策焉能以  
致是臣等並受國恩待罪南都有所見聞雖不奉明詔  
亦當披肝瀝膽以圖補報萬分之一況明詔許諸人直  
言無隱若猶噤而不言言而不直是臣等上違聖諭下  
失民望將何顏以立於聖明之朝乎竊惟朝廷之布政  
令也猶上天之降祥異也一政令之得宜若禎祥之見  
而天下無不忻悅一政令之失宜若災異之來而天下  
無不驚懼易曰君子居其室出其言善則千里之外應

之不善則千里之外違之況政令乎誠能發其善者而行之其不善者而改之則民自安天意自回尚何災異之不可弭而禎祥之不可至哉臣等欽遵明詔謹條陳今日缺失利病一二事昧死以聞伏乞聖慈俯垂睿覽采而行之天下幸甚臣等幸甚

計開 一洪武永樂年間官有定員朝無倖位是以賢能盡職食之者寡近年以來無功而陞無能而進者日多一日他如工藝之人逋逃之徒邪術之輩各

尋蹊徑得美職而服章服者充滿朝市實是虛糜廩  
祿虧損名器非所以勵賢能而勸有功也合無今後  
文職非由進士監生吏員出身者勿授武職非有軍  
功者勿陞其已陞除額外文職悉令記名回家待有  
缺之日聽吏部察其可用者取用係醫卜匠藝出身  
者悉令各執本藝每月止支食米一石其餘俸錢阜  
隸俱各革去其軍職非有軍功而陞在錦衣衛帶俸  
及管事者俱改調在京各衛帶俸止食原俸原無俸

者每月亦止與食米一石餘俸俱各革去悉令差操俱不許管軍管事兩京一例若在成化十一年以前陞用及貴戚之家循例而陞者悉令照舊其在京考滿該陞官員內樂舞生出身止於太常寺官天文生出身者止於欽天監官醫生出身者止於太醫院官匠人出身者止於工部所屬文思院營繕所等衙門官叙用俱不可授以六部都察院通政司大理寺等衙門堂上官庶不虛費錢糧混亂名器 一近聞太



監梁芳差鎮撫梁山舍人梁用馳驛前來兩淮運司  
關支欽賜官鹽五萬引著令該司出備包索船錢用  
銀數多該司無從措置被其逼迫今奉明詔不許勢  
要之家屯鹽雖稱前鹽係是欽賜之數百姓愚昧難  
以戶曉未免致疑又令運司出備包索船錢人情愈  
加不堪伏乞聖裁合無將梁山等取回前鹽住支今  
後各處鹽課俱各存留以備邊儲敢有仍前求討者  
許戶部及科道官糾劾使人無覬覦官有儲積一

南京朝陽門外漆園原設百戶二員甲軍一百餘名  
每三年一次行取直隸廬州府人匠二十名到園開  
漆所得漆不過二百斤機園原設百戶一員甲軍一  
百餘名每三年一次行取江西南昌府土民八名到  
園剥機所得機毛不過二百斤俱差內官一員監看  
開剥桐園原設百戶二員甲軍二百四十名每年行  
取應天府油戶不限名數到園收領桐子打油除存  
種子外所得油止有一百餘斤俱送內府南京丁字

庫交收南京工部遇有修造黃戰船隻等項又去該  
庫關支合無今後止令該園餘丁自行開漆剥棧及  
雇人打油免再行取廬州等府開漆人匠剥棧土民  
打油人戶及免差內官監看所得生漆棧毛桐油照  
數就送本部交收庶使事體不繁出納兩便 一南  
京兵仗局現有欽差內官四員各帶領匠作一十四  
員名在局成造擺朝軍器五萬七千五百頂副經今  
三年未完緣地方災傷人民缺食南京工部及應天

府措置物料借倩夫匠并應天府供給下程等項俱各艱難合無將前項軍器暫且停止收過各項物料公同南京工部并應天府委官查盤見數收貯官庫待後豐收之年行令南京守備太監提督該局照數成造仍將各項物料應減省者減省應改會者改會庶使人無重勞料不虧費 一南京御用監內官監等衙門每年起運竹木板枋數多撥船裝載沿途拽運勞人乾淺去處又行起車裝載勞人尤甚況連年

災傷人民流亡合無將前項竹木板枋停止一二年  
以後減半起運庶使人無怨嗟料有撙節 一端人  
正士何代無之異端邪術世亦常有所貴察其忠良  
辨其姦妄而登用之擯斥之爾近者員外郎林俊經  
歷張黻以言事謫官尋蒙收召復其職任國師繼曉  
以左道惑衆亦被放逐遣歸田里此足以彰陛下天  
地之量日月之明容受其直而特為寬貸洞燭其誣  
而不為欺罔也竊惟諸司之中固嘗有先林俊張黻

而被謫者天下之大亦豈無後繼曉而行術者合無  
吏部通查數年以來有因言事或降調外任或冠帶  
閒住悉令復職俾圖自效如有政令缺失仍許直言  
無隱及令都察院行委巡城御史五城兵馬嚴加禁  
治如有姦妄之徒或執巧技或挾邪術者不許潛住  
京師希求進用敢有窩藏隱匿者罪及鄰佑如此則  
異端不至橫流正道可免榛莽 一各處府州縣學  
廩增生員近年以救荒許納粟銀入監出身中間多

有白丁錢虜或在學無成或入學未久或臨期冒報  
有司急於應令起送不暇詳審如此生徒學業未成  
禮節未習僥倖入監束書日計若又放回依親寧無  
忌肆或暴橫鄉里或干謁官府日後選用惜焉面牆  
妨政害民實多有之合無分送南北國子監不許放  
回依親著令自備柴米坐堂肄業本監學官用意講  
授務俾成材庶他日選用不至瘠曠 一正統天順  
年間南京龍江大勝二關各止差內官內使三員名

守把皇城各門并都城各門各止差內官內使二員  
名守把近來龍江關差太監奉御共六員大勝關差  
內官內使共七員名皇城各門差內官內使十餘員  
名都城各門有差內官內使五七員名者亦有三四  
員名者又內府南京甲字等九庫比先年間每庫止  
有內官內使二員名公同該庫官收支錢糧今各庫  
有內官內使五七員名者亦有十三四員名者政出  
多門弊難枚舉合無行令內外守備官將各門各關



并各庫添差官員盡行革退令其各管本等職務照依正統年間事例存留守把管理免致多占官軍庫役妨誤公務 一在京針工巾帽二局每年各差內使二名管送布絹等物前來南京染作卻裝回京與內官做造衣被巾帽等件該與在京內官者就彼給散該與南京內官者帶來南京給散差來內使在南京有住暮年者亦有住七八箇月者有司日逐供給艱難占用馬快船及洗箱軍軍民人夫數多有妨差

操兼且一往一來不無勞擾合無今後北京內官衣被巾帽等件就在北京做造給散南京內官衣被巾帽等件就在南京做造給散庶免往來勞涉騷擾軍民一南京龍江廠原係民間納糧田地先年設立堆放楠木俱已用盡止存朽爛不堪者數根其該廠房屋牆垣俱各坍塌現今地土空閒仍前占用軍餘一百餘名看守合無將地土給還原主領種辦納錢糧朽爛木植變賣銀兩入官看廠軍餘退回原衛當

差於官無損於民有益 一直隸蘇州等府買辦年  
例供應器皿項下黃紅羅黃紅絨金箔銀硃土硃生  
漆桐油熟銅熟鐵鏡面錫等項及四川布政司折納  
歲辦皮張項下生漆熟鐵等項多是差人齎價前來  
南京收買卻被攬頭光棍誑騙花費或被解人舖行  
通同侵分中間情弊多端難以枚舉以致前項物料  
不得完納有誤造作合無今後南京工部將前項物  
料價銀分派各該司府徵收起解本部轉送應天府

官庫收候買辦送用若有積出附餘銀兩准作下年之數其一時物料內有高貴及價銀內有不敷本部另行處置庶使情弊可革工程易完 一應議官子孫在京法司有奏准事例徑行提問今南京法司但應議官子孫有犯俱先提事內人問理有礙將原告并干証人監候羈候奏請提問有行提數月并半年之上不出官者及至問完不拘徒杖罪名一槩監候請旨發落未免久候及監候人難合無查照在京法

司事例前項應議官子孫有犯除皇親外其餘有犯亦就提問問完之日徒罪以上監候杖罪以下羈候俱奏請發落庶為便益 一南京御馬監每年起運苜蓿種子四十扛俱係南京太僕寺坐派養馬軍衛有司辦納蓋是先年北京地方不產此種以此取去播種今北方已種六七年豈無種子可種今却仍舊起運以事言之雖小而徵斂解納之際所費實多皆出自軍民合無行令南京御馬監今後不必行取

首宿種子解京庶免科擾下人受害 一朝廷差內

臣在浮梁縣景德鎮燒造御用磁器今已年久雇覓夫匠買辦柴土顏料及供給監燒官員人等每年用銀不下數千餘兩俱是饒州等三府小民出備雖曰磁器計其所費不減銀器之價近聞原差內臣隨陞太監鎮守江西往來提督而家人常川在彼生事尤甚供給益侈即今三府之民疲敝困苦不可勝言且饒州鄱陽湖邇迤數百里上控荆襄之衝一有警急

民窮財盡何以為備此三府之民誠可痛憫而燒造之役所當急罷也況所燒磁器年積月累其數必多合無暫且停燒造三五年以蘇民困待後缺用再行燒造亦未為晚一雲南福建浙江等處雖有出產銀冶府分其間或屢有頑梗之徒嘯聚為非地方人民因而不安者況中間鎮守太監或有於每年冬月親去前項府分煎銷銀課往來供應頭目人等甚是勞擾合無今後止令專管銀場布按二司官員每年

督完銀課解至總司會同太監煎銷實為民便 右  
件臣等畧陳一得之愚如此伏惟皇上仁孝恭儉敬  
天勤民宜乎天人交感協氣嘉生而乃年不順成災  
異迭見者無他皆由臣等不能仰副聖明所致乞將  
臣等罷歸田里別選賢才任用庶回天意

成化二十一年二月初七日具題三月初八日奉聖旨  
是文武醫匠等官取回支鹽鎮撫并禁造寺觀降調官  
員已處置了板枋免運一年大勝等關門官軍著南京



守備太監定奪具奏成造軍器納粟生員坐監買辦物料提問應議官子孫該衙門看了來說造給衣帽等件起運苜蓿仍舊看廠軍餘量留二十名磁器燒完了停止其餘准議行陳俊等不准罷歸著盡心辦事該部知道欽此

乞休致奏狀

臣係陝西西安府耀州三原縣人由進士改庶吉士正統十四年欽除大理寺左評事歷陞左寺副知府左右

布政使成化元年欽陞都察院右副都御史撫治流民  
二年以功陞本院左副都御史巡撫河南一年陞南京  
刑部左侍郎管部事九箇月餘丁父憂服除改刑部左  
侍郎總理河道年半有餘改南京戶部左侍郎管部事  
將三年半復改都察院左副都御史巡撫雲南陞本院  
右都御史仍前巡撫一年有餘改南京都察院右都御  
史叅贊機務陞南京兵部尚書仍叅贊機務共一年有  
餘改兵部尚書兼都察院左副都御史巡撫南直隸蘇

松等處地方總理糧儲五年有餘復改南京兵部尚書  
叅贊機務今又一年有餘臣以卑鄙庸才仰荷聖明知  
遇歷官凡十六轉任事幾四十年或入陪廟堂或出巡  
方岳寵榮已極感幸何加徒懷犬馬之心莫報乾坤之  
德第以衰朽應合退閒已嘗再三上章懇乞休致俱蒙  
聖恩勉留俾之仍前理事今臣年已七十例該致仕又  
且老病侵尋雖仍戀闕庭力實不堪鞭策食焉無補居  
之弗安伏乞聖慈矜憫將臣放歸田里另選賢才以充

任使庶不妨賢悞事斯有益於國家矣臣下情無任感  
激隕越之至

加陞太子少保謝恩疏

昨臣以右都御史尚書九年考滿具奏取進止而蒙聖  
恩加臣太子少保照舊管事者伏念臣性資愚魯學術  
空疎荐歷崇階累叨重寄無補於世有愧於心具奏之  
時自謂官已踰分年已衰老得一致仕足矣不意今日  
荷茲殊恩臣有以見陛下不遺疎遠之深恩寵異老臣

之盛德也感激良深未易云踰第臣職守南都不能入侍左右少效忠勤補報萬一但願皇圖鞏固聖壽齊天前星依帝座以常輝主器守宗廟而永泰非獨臣感恩思報之心如此而天下臣民愛戴祝願之心亦莫不如也臣無任瞻天仰聖激切屏營之至除望闕謝恩於今年二月初一日到任管事外具本專差千戶李賢齋捧稱謝謹具奏聞

督修孝陵工完奏狀

照得成化二十二年五月十九日欽奉勅命臣同守備  
太監張本嚴督內外該管官員併工修理孝陵臣遵奉  
勅旨會同太監張本并守備內外官員恭詣孝陵同該  
管太監鄭彊隆平侯張祐工部侍郎劉俊等看得孝陵  
殿宇門廡碑亭等項俱已修完惟明樓已抓縛鷹架做  
造斗科等件止因四川原採大楠木未到未曾拆修又  
看得周圍牆垣除修完外止有一千七十丈未完及臨  
漿糲房牆垣損壞六十五丈未曾修理隨令各官督工

修築完備於本年六月初五日疎放軍夫匠作暫且歇  
工候催楠木至日另行擇日興工及將修完工程用過  
物料價銀口糧并原辦未到物料總數開坐具題外至  
二十一年四月內楠木方到本年七月十二日又節該  
欽奉勅命臣同守備太監錢能嚴督原管太監鄭彊隆  
平侯張祐工部侍郎劉俊并內外該管官員量撥用工  
官軍匠作毋令空閒後占計算在官合用物件并價銀  
及支給錢糧毋令冒妄浪費仍逐日併工修造早為完

備欽此臣又遵奉勅旨公同太監錢能行令鄭彊張祐  
劉俊等量撥官軍匠作南京欽天監擇於本年七月二  
十一日興工修理興工之後鄭彊等日逐躬親提督工  
程郎中毛科專管收放物料工價臣等亦常不時前去  
督併執役之人各盡心力罔敢怠忽將明樓大梁及角  
梁枋桁斗科椽望銅絲簷網券門寶山城垣金水橋墁  
欄板等項但係損壞者俱各脫換修理揭瓦墁砌彩畫  
油漆至本年三月二十一日工完會同守備內外官員



并該監官詣前拜觀羣情莫不忻悅仰惟聖祖在天之靈亦可以少慰矣先該臣等行令郎中毛科自興工日為始日逐做過工程用過物料并工價銀兩等項每半月一次開報逐旋查算工完之日臣等又行通前查算明白除令南京工部照依工部原行事理將修完工程用過物料等項另行造冊奏繳外緣係奉勅督修孝陵工完事理具本專差指揮石文通齎捧謹具題知

將順上意匡輔時政疏

臣伏聞近有聖旨禁約今後不許擅便奏討陞官及遷轉各人名下并文武外官邊將及奏討蟒衣并替人討蟒衣及不許奏要在內府騎馬又聞自有此之後諸色人等俱不敢進貢物件希冀陞賞朝政肅然小大之臣罔不畏天之威駁奔承事中外臣民間之莫不歡忻鼓舞稱頌聖德而詠歌太平也夫此數者不禁止則官及私昵而政事為之不立利歸權門而邊儲為之不足豪右兼并而小民為之困敝名器混淆而上下為之無別

僭踰日肆而禮法為之蔑如紀綱廢弛而教化為之不  
行人皆知此數者之為聖政累久矣但恐禍及身家所  
以多不敢言去歲正月皇上因天變勅論文武百官令  
其陳奏敝政兩京臣僚間有言及之者或指陳失直或  
言詞過當是以多不蒙採納間有採而行之者不久又  
行更改而言者反遭笞謫間有優容者其心兢兢業業  
常不自安有若官校之隨其後所以前事日益滋熾而  
無已有志為國者日益畏縮而不敢言也茲者皇上不

因左右之言臣僚之諫而有此聖旨是蓋皇天眷佑國家將隆萬年無疆之休故啓宸衷而為之此臣民間之所以歡忻鼓舞而稱頌詠歌也然此數者誠能持之堅禁之久而無所變更則天下國家何患乎不治安宗廟社稷何患乎不靈長四夷八蠻何患乎不賓服羣黎百姓何患乎不蒙福也如或持之不堅禁之不久而有所變更非惟有失大信於天下抑恐難保無虞於將來伏望皇上執此之政堅如金石行此之令信如四時仍將

節次聖旨禁約事意傳與在京各衙門并科道知道今後但有故違勅旨奏討前項恩澤者俱照勅旨內叅奏其奉特旨批出傳奉而與者亦要執奏不可有失大信如此則紀綱振肅而教化大行億兆歸仰而宗社靈長矣然臣此言非欲矯情以沽名而舍生以取禍但欲成皇上之美政為恃寵者弭後患耳惟聖明察其心而赦其罪幸甚具本專差辦事官徐徽齋捧謹具奏聞

孝陵工完受賞謝恩疏

伏蒙聖恩以臣同守備太監錢能奉勅督修聖祖孝陵  
工完賜臣紵絲一表裏生鈔一千貫者竊惟臣猥以章  
句之腐儒叨膺叅贊之重寄凡百朝命皆當奉行矧夫  
陵寢工程敢不躬親提督經之營之乃百工之成效輸  
焉與焉豈一夫之用心臣實無功何敢望賞辭之恐蹈  
不恭之罪受之難逃非分之譏揣已則踧踖不寧感恩  
則汪洋無際除叩頭祇領望闕謝恩外具本專差辦事  
官舒光發齋捧赴闕稱謝謹具奏聞

欽定四庫全書



王瑞麟奏議

王端毅奏議卷六



欽定四庫全書

王端毅奏議卷七

明 王恕 撰

吏部

老疾不能赴召奏狀

成化二十三年十一月十一日節該欽奉勅勅至爾即  
馳驛來京欽此伏念臣愚昧寡學無所知識仰荷列聖  
之恩叨由科第初授大理寺評事厯陞至太子少保南  
京兵部尚書叅贊機務去年先帝以臣年老賜臣以尚

書致仕使臣得優游田里苟全餘齡恩莫大焉今皇上  
新即大寶念及舊物遣使齎勅召臣臣亦欲躍然而起  
以覩道德之光第臣年已七十有二不時疾作間命之  
初即欲辭避而來使不從乃於本月二十五日上道一  
程而至西安府遂感痰嘔之疾腸胃疼痛一日一夜不  
止自臣原籍至京計四十三站今止行一站疾作不能  
前進若待調理痊可方進不無遲滯儻若前途其疾復  
作豈能保其安全況臣素無經濟不堪任使伏望聖慈

容臣仍前致仕庶得老年不致失所不勝感戴隕越之至  
成化二十三年十一月二十七日具奏十二月二十  
二日奉聖旨卿老成重望特茲起用所辭不允偶有微  
疾還著所在有司好生撥醫調治痊可即便前來欽此  
辭吏部尚書奏狀

臣原任太子少保南京兵部尚書參贊機務去年以尚  
書致仕在尚書第四考之間遇蒙今年四月十七日覃  
恩詔例進從一品散官一階書生至此榮幸已極感激

無涯莫知所以為報近蒙聖恩遣使齋勅召臣臣謹遵  
嚴命啓行至于西安府賤體不安已嘗具本奏乞仍前  
致仕稍安前進以俟俞旨十二月初一日至於華陰縣  
復奉改臣吏部尚書之命續蒙聖恩不允臣辭令臣前  
來今臣已到臣竊惟今之吏部尚書即古冢宰之職也  
古之冢宰掌邦治統百官均四海伊尹傳說蓋嘗以冢  
宰兼師保左右厥辟矣今之吏部尚書雖曰專主銓選  
而銓選一事治與否之攸繫銓選得人則治不得人則

不治其責任亦不為不重非才德出衆明哲過人者不足  
以當之臣素無才德今益昏塞耄倦而濫膺是寄大  
懼不協時望有忝休命非臣之福也伏望聖恩收回新  
命另擇人以授之賜臣仍以舊職致仕如此非惟天工  
可以寅亮而臣亦可以免羞吝矣臣下情無任感戴之  
至成化二十三年十一月二十七日具奏次日奉聖旨  
卿年德老成久為人望特茲簡任不允所辭欽此

辭太子太保奏狀

該司禮監太監覃昌傳節奉聖旨吏部尚書王恕加太子太保欽此伏念臣先任南京兵部尚書荷蒙先帝憐臣年老賜之歸休感激未已圖報無由誤蒙皇上特賜璽書召臣到京改為吏部尚書俾之職掌銓衡臣自惟年耄德衰不稱厥職已嘗具奏懇辭未蒙俞允本欲再辭恐負厚眷是以姑且就職另圖陳乞不意聖恩又以前官加臣使臣聞命驚懼益增汗顏竊以太子太保乃三公之一所以論道經邦變理陰陽者也責任視尚書

尤重非才德兼備之人不足以當之昨改臣吏部尚書  
臣尚不克堪今又加臣以是官臣又何敢當所有新命  
臣不敢祇受伏望聖慈容臣且以尚書供職圖惟報稱  
使非分之恩不及臣身不稱之譏不出衆口實莫大之  
幸也臣無任戰兢懇切之至成化二十三年十二月二  
十九日具奏次日奉聖旨吏部重任朕特起卿用典銓  
衡以圖治理加陞職事卿不必辭欽此

議左監丞郭鏞建言選法奏狀

文選清吏司案呈奉本部送准禮部咨儀制清吏司案  
呈奉本部送於內府抄出御馬監左監丞郭鏞題云云  
等因具奏奉聖旨該部看了來說欽此欽遵移咨送司  
案呈到部看得左監丞郭鏞題稱近年以來專以科甲  
取士中間未必皆賢國子監生未必無所取材山林隱  
逸懷材抱德之人少見錄用薊州知州豐潤學官經年  
不除務將選法疏通毋使阻塞賢路一節照得我朝自  
洪武永樂以來養士於學校取士於科貢銓選內外官



員則於辦事進士歷事監生之中挨次相兼取用未嘗  
專一甲科而不用國子監生自景泰天順以來鄉試會  
試所取士子視昔數多國子監生除歲貢生員之外又  
有納粟納馬四十以上等項入監者吏員之中亦有納  
粟納銀免其考試辦事就行冠帶者是以聽選之人日  
增月益用之不盡其於山林隱逸懷材抱德之人未及  
舉用去年十月皇上詔告天下令府州縣正官舉懷材  
抱德堪為任用者送部核實考用如有舉到之人臣等

謹遵明詔即當核實考用不敢有違及查得薊州知州  
豐潤縣學官員缺已於成化二十三年十月日期不等  
選補去訖所言務將選法疏通毋使阻塞賢路臣等查  
得成化二十三年二月到今急選并大選官員通有六  
千三百餘員兩月一選已是定例如遇急缺又行急選  
隨補隨缺豈能得完臣等職司銓衡固欲疏通選法亦  
欲為官擇人且如知州知縣俱是牧民正官府佐之官  
亦係緊要職事苟非其人鮮不廢事殃民況入選進士

監生吏員俱是挨次取用一選之中所取之人有堪任  
前項官員者數多則多選幾員數少則少選幾員是乃  
圓融之道非固執之法此等之事人多不知所以各據  
已見而言之臣等既任是事敢不盡心以副聖明用人  
圖治之意緣奉欽依該部看了來說事理弘治元年正  
月十九日具題二十一日奉聖旨是欽此

覆給事中韓鼎公選法奏狀

文選清吏司案呈奉本部送禮科抄出禮科給事中韓

鼎題云云等因具題奉聖旨該衙門看了來說欽此欽  
遵抄出送司案呈到部看得給事中韓鼎所言考選監  
生出論有請客之名要行出判語及令親供一節臣等  
議得考選監生出以論題觀其作文以第高下此舊規  
也奈何所考監生賢愚不一能者依經傍註一篇可成  
不能者閣筆張眸一辭莫措却乃不依本題別寫他作  
故人謂之請客此等之人固不當取但人材難得是以  
或觀其寫字或觀其人物而次第之以備下僚末職之

用未嘗有棄材也若與能者出論題與不能者出判語是使學者皆記判語而不學作文非法之善也合無今後考選監生聽本部出題取其文理平順者為一等文理頗通者為二等文理不通若寫字人物有一可取姑以入選如此則考選有方而高低自別矣其言各衙門主事等官有歷俸三年二年或未及二年而驟陞者有七年八年或九年將滿而纔陞者拘於各部似乎不公要照郎中林堃等調改復除事例不分本部別部以歷

俸年深者陞用一節臣等查得往者各部缺官若本部有相應人員就於本部陞用無相應人員方於別部陞調此見行事例若戶部郎中林堃員外郎吳裕調吏部是也若但以歷俸年深為主不分清濁勤惰一槩更調如歲貢例不無賢否混淆紛更太甚合無今後轉陞官員如某部缺郎中員外郎先儘本部年深相應員外郎主事銓補如無相應者則於別部年深相應員外郎主事調補如此則選法公而人心勸矣其言旌異推舉有

舉取未成而問發為民有旌異方畢而問發克軍有行  
取到部調除原職者要行連坐舉主一節所言有理合  
無今後在外官員果有廉能公正政蹟卓異聽巡撫巡  
按等官從公旌舉各注舉主於旌舉官員之下日後犯  
贓連坐舉主如是庶幾舉能其官用得其人矣緣係陳  
言公選法及奉欽依該衙門看了來說事理未敢擅便  
弘治元年正月十九日具題二十一日奉聖旨是欽此  
論致仕為民丁憂官吏類引奏狀

考功清吏司案呈伏覩大明律內一款若內外大小官員但有不便事件許令明白條陳實封進呈取自上裁欽此欽遵照得本部見行事例兩京堂上官丁憂并內外官九年給由到部年老願告照例陞職致仕者俱具題請旨放回其公差等項年老有疾例該致仕閒住官員與夫告疾等項例該為民吏典及在京科道部屬以下官員并醫士丁憂者却令聽候類引奏請然後放回如遇人多聽候一月止可類引一次若是人少聽候兩



月之上方可類引一次有此事體不一下人不便呈乞  
施行等因到部臣等切詳致仕為民丁憂官吏醫士俱  
係失意可矜之人使其就行回還心尚不安却又令其  
聽候累月方纔引奏放回何以慰其羈旅憂思之心兼  
且日費艱難人情實有不堪合無今後遇有前項致仕  
為民丁憂官吏醫士到部照依兩京堂上官丁憂并年  
老願告陞職致仕官事例具題請旨就行放回如此則  
可矜之人不致羈留朝廷之上亦免煩瀆實為兩便緣

係定奪引奏官吏人等事理未敢擅便弘治元年正月二十日具題奉聖旨是欽此

調用南京堂上官奏狀

文選清吏司案呈照得南京吏禮二部尚書侍郎俱缺合行照例具缺推舉等因到部臣等看得去年朝廷進退兩京堂上官并各處巡撫都御史及在外方面數多前項員缺須得老成重望練達政體之人方可推舉今各處方面多係近新陞用歷任年淺似難推舉南京各

部頗為事簡戶部見有尚書王與左侍郎侯瓚工部見有尚書黎淳右侍郎黃孔昭合無於內調一員於吏部一員於禮部管事姑待一年半載各處方面歷練頗熟然後推舉如此則任用不苟事體允當緣係急缺南京堂上官員事理臣等未敢擅便定奪弘治元年正月二十日具題當日奉聖旨王與調南京吏部黎淳南京禮部欽此

議都御史邊鏞保治奏狀

文選清吏司案呈奉本部送准禮部咨該都察院左副都御史邊鏞奏云云等因具本奏奉聖旨這本所言該衙門看了來說欽此欽遵抄單移咨送司案呈到部當將本官所言任賢以遠姦諛等六事逐一看議明白各開前件伏望聖明裁處緣係節該奉欽依該衙門看了來說事理未敢擅便弘治元年正月二十一日具題奉聖旨准議欽此 一議得君子小人迭為消長君子進則小人退小人進則君子退自古未有用君子而不治

用小人而不亂者也且執德守義正直中和者君子也  
巧言令色便僻側媚者小人也但君子難親而易疎小  
人難疎而易親陛下新服厥命固嘗用君子而退小人  
矣今都御史邊鏞拳拳以是為言者第恐君子雖用而  
信任不專使小人得以間之終不能成其治小人雖退  
而屏逐不遠後將夤緣復進終有以害其政既知其為  
君子而任之則不必致疑知其為小人而去之則不可  
復用如是則正人立朝而萬邦咸休矣 一議得都御

史邊鏞所言納諫以廣言路一節誠人君為政第一事也陛下嗣位之初嘉言無不納善政無不舉弊政無不革臣民無不悅服若李文祥之奏疏其意雖忠直其言則逆耳陛下畧不加罪但除事繁縣佐使之歷練以成就之恩莫大焉不知者以為貶李文祥以箝言者之口此邊鏞所以為陛下言之合無准其所言行取李文祥前來照依甲第資格改除在京事繁衙門使之歷練以成其德器一以釋衆人之惑一以全納諫之美不亦善

乎一議得勸懲者人君之大柄所以歆動人心而警懼天下者也今都御史邊鏞所言別善惡以昭勸懲一事誠為有理臣等又聞古人有言賞必自疎遠始罰必自貴近始賞自疎遠則賞一人而千萬人勸罰自貴近則罰一人而千萬人懼陛下若納邊鏞之言用古人賞罰之法則善無不勸惡無不懲而天下治矣一議得名器者人君之至寶所以彰有德而別有能若不擇其人而授之則奔競之風起而廉耻掃地矣其何以為國

乎陛下新服厥命擯斥奸佞惟賢是用固未嘗以名器  
假人矣今都御史邊鏞猶以是為言者但恐寡廉鮮耻  
之人尚在投間抵隙之念未絕惟願陛下始終此心始  
終此政杜絕先容之私言自無倖進之妄人夫如是又  
何患名器之不重而朝廷之不尊乎 一議得都御史  
邊鏞所言乞勅巡撫巡按等官嚴加訪察守令務致的  
實名著循良者指實具聞即便擢用而無拘乎資格政  
果貪酷者據實訊問即便罷黜而無待於朝覲其守令



之中尤有循良之最者書於御屏或錫車服以彰其能  
一節查得節次詔書與夫巡撫都御史勅諭并本部奏  
行事理其於守令之賢否俱有旌擢黜退之典今邊鋪  
復以是言之者蓋是巡撫巡按等官奉行未至合無通  
行各處巡撫巡按官查照節次詔書并勅諭及本部奏  
行事理嚴加訪察知府知州知縣等官某人廉能公正  
某人貪酷害民某人罷軟無為某人年老有疾當旌擢  
者具其政蹟奏聞當獎勸者量為獎勸當罕問者就行

拏問當黜退者就行黜退當致仕者行令致仕務在至公無私不許顛倒是非致失勸懲之道自取失職之譏  
一看得都御史邊鏞所言陛下於文武大臣之中留神俯察先識其言語動靜次察其才能性行孰可宰銓衡孰可總風紀孰可為大將孰可為副參孰可撫安一方孰可守鎮要地既即事以驗其才再因才以授其職不因瑕以掩瑜務舍短而求長一節誠為簡任大臣之良法但自正統年間以來每日止設一朝或兩朝每一

朝臣下進見說事不過片時聖主雖聰明豈能盡識盡  
察不過寄聰明於左右之人大臣與左右之人相見者  
不多左右之人亦豈能盡察識諸大臣之賢否亦不過  
寄聰明於門客門客之識見未必盡合公論或得之毀  
譽之言或出於好惡之私是以以直為枉以枉為直者  
多欲察識之得其真必須陛下日御便殿宣召諸大臣  
與之講論治道謀議政事或令其轉對或閱其章奏如  
此非惟可以識大臣而隨材任使亦可以藉收啟沃之

助

議郎中李諒以進士舉人知縣相兼選御史奏狀  
文選清吏司案呈奉本部送准禮部咨儀制清吏司案  
呈奉本部送禮科抄出南京禮部精膳清吏司郎中李  
諒奏云云等因具奏奉聖旨該衙門看了來說欽此欽  
遵移咨到部查得舊制御史給事中員缺多是進士除  
補進士或少間以聽選教官舉人監生補之至成化六  
年以來除授御史拘於憲綱不用新進初仕之說一向

不用進士止於進士出身推官知縣行人內選用奈何行之年久不能無弊案呈到部切詳推官知縣進士俱讀聖賢書俱由科目出身豈進士無練達老成之人推官知縣皆不才奔競之士顧擇而用之何如耳苟擇得其人則皆可用用匪其才則皆不稱此必然之理不易之論也今南京禮部精膳清吏司郎中李諒奏要仍照舊例於進士中年貌相應學行優長及聽選舉與在外進士知縣儒學官員相兼任用御史一節誠為得宜合

無准其所言今後選用御史於在京各衙門辦事進士  
與夫曾經一考稱職行人博士及進士舉人出身推官  
知縣內選年三十以上五十以下人物端莊言語正當  
操行廉謹才識優長者送都察院理刑半年滿日聽本  
院考察各註考語連人送部諳曉刑名堪任御史者本  
部奏請照缺選用不諳刑名不堪為御史者別用但知  
縣推官係在外官員本部雖嘗訪察知之未詳合無通  
行各處巡撫都御史各於按屬進士舉人出身知縣推

官內從公推舉如前相應之人備開脚色政績具奏以憑遇缺行取相兼進士行人博士選送理刑不許舉非其人如此則選擇得人風憲克稱其職矣緣係考選風憲及奉欽依該衙門看了來說事理未敢擅便定奪弘治元年正月二十日具題二十七日奉聖旨是欽此

議尚書余子俊均選法奏狀

文選清吏司案呈奉本部送兵科抄出太子太保兵部尚書余子俊題云云等因具奏奉聖旨該衙門看了來

說欽此欽遵抄出到部謹將本官所言議擬開立前件緣奉欽依該衙門看了來說事理未敢擅便弘治元年正月二十五日具題二十八日奉聖旨是選法只照舊欽此 一看得太子太保兵部尚書余子俊所言近年以來銓衡之司公天下以為心者絕少美官多私於所厚以致正人君子每每垂首喪氣莫展平生所志一節此臣等吏部官受病處今既有以發之臣等即當自怨自艾圖惟厥新務要銓法公平好官不私於所厚君子



不怨乎不以其言若選兩京官員若六部額設屬官各若干都察院額設屬官各若干六科總紐額設各若干以會試三等之數為則均平銓除如吏部大約南數該幾員北數該幾員中數該幾員著為定例間有一二員不甚相當非出於私意者置之勿論其他衙門一如此例其不該銓除戶部者均平於兩京衙門用之各不許膠固使南北中數常在此一司此一科此一道一節此誠自古所無之法須得天下奇才方可擬議而行若使

臣等淺見薄識者議之設或向後分配不停當用人不稱職徒自紛更致壞選法罪將焉歸且如一方有鄉談之人均選於通政司鴻臚寺使之祝讚說事不識可乎一方寡詞藻之士均選於翰林院詹事府使之脩史作文亦不識可乎然而此事所係甚重臣等豈敢輕議伏乞聖裁

論王府保舉官員奏狀

文選清吏司案呈奉本部送內府抄出淮王奏云云等

因具奏奉聖旨吏部知道欽此欽遵抄出送司查得劉奎前項府縣人由生員成化二十一年七月遇例納銀送南京國子監放回依親讀書至今纔方二年有餘及查本部聽選監生自入監歷事以來守候十八九年方得除授今劉奎之為監生未及三年輒便希求保舉圖任伴讀若准所保不無遂其僥倖之計阻滯年深之人及查得天下王府二十五處額設官員不為不多除良醫典膳典樂外其餘俱係常選官員近年以來遇有員

缺往往奏保或稱妃兄妃弟或稱儀賓親屬與凡相熟之人不論可否一槩奏保任用實是有壞選法阻滯常選之人案呈合無今後王府官有缺該長史司即便呈報各該布政司轉達本部照缺於監生吏員內相應人員銓補不許仍前奏保攬越仕籍阻壞選法如此則奔競者不得倖進守正者免其嗟怨仍行各該布政司啓王知會緣係乞恩舉保官員及奉欽依吏部知道事理未敢擅便弘治元年閏正月初一日具題次日奉聖旨

是欽此

議僉事林淮願就教職以便養親奏狀

文選清吏司案呈奉本部送吏科抄出雲南按察司僉事林淮奏云云等因奏奉聖旨吏部知道欽此欽遵抄出送司案呈到部看得雲南按察司僉事林淮奏稱雲南路遠母老不堪就養辭官則家貧難供朝夕置親則無人可託乞要授以本處或附近府縣學教授教諭以便養母一節情實可矜況本官辭尊居卑辭富居貧豈

得已哉合無俯順其情授以附近地方府學教授職事  
令其到任以便養親親終仍除僉事職事一以慰本官  
母子之情一以為臣下忠孝之勸等因具題奉聖旨是  
欽此欽遵今查得直隸常州府儒學見缺教授一員欲  
遵奉欽依事理將林淮除授直隸常州府儒學教授順  
齋文憑令其到任管事未敢擅便弘治元年閏正月初  
四日具題次日奉聖旨是欽此

議按察使雍泰犯罪乞從輕宥免奏狀

文選清吏司案呈准刑部山西清吏司手本開問得犯人雍泰由進士任山西按察司按察使犯該除監臨官因公事於人虛怯去處非法毆打至死等罪不坐外合依各衙門收支錢糧等物監臨主守不正收正支那移出納還充官用者計贓准監守自盜論四十貫罪止律尹珍依奏事詐不以實者律各減等徒罪俱職官各還職內雍泰送吏部收查發落查得先該錦衣衛鎮撫司叅稱雍泰既居風憲之職自合存心公恕為當却不合

擬罪失於出入鞫問過於用刑雖是因公致傷人命又  
乃那移錢糧擅打四品官員尹珍不合傲慢上司致罪  
取辱又出惡言毀罵及捏虛詞奏擾等因該大理寺官  
奏節奉聖旨這各犯雖遇革雍泰致傷人命送吏部查  
例來說尹珍奏事多虛復職了還罰俸三箇月欽此欽  
遵抄招連人送司除知府尹珍復職罰俸另行外隨於  
本部見行事例內查無因公致傷人命之條止查得朝  
覲考察官員內有貪酷者為民事例案呈看得抄招內



雍泰所犯委的只是因公用刑致傷人命比之貪酷害民者頗有不同況又犯在革前罪既有免比例發落亦宜從輕且知府尹珍係按察使雍泰屬官上下體統豈可紊亂尹珍越禮犯分傲慢上司雍泰若不懲治有失體統何以管人尹珍又出惡言毀罵及捏虛詞奏擾今尹珍復職若將雍泰別作發落但恐今後彊梁屬官遞相效尤因而違抗上官上官懼其奏告不敢管攝紀綱自此紊亂而法令不行於部屬所係匪輕緣係節奉欽

依雍泰致傷人命送吏部查例來說事理臣等愚見如此未知是否弘治元年閏正月初二日具題初四日奉聖旨雍泰既犯在革前從輕降一級調方面別用欽此欽遵查得雍泰原任按察使係正三品今降一級該從三品與在外布政司參政品級相等今查得湖廣布政司見缺右參政一員欲遵奉欽依事理將雍泰降補前缺給憑令其赴任管事未敢擅便本月初十日具題當日奉聖旨是欽此

選用新舊進士兼懲規避奏狀

照得舊例進士登科之後自本年至第三年第二甲進士內則選主事等官外則選知州第三甲進士內則選評事行人等官外則選推官知縣至第四年不分二甲三甲俱選主事等項京職以其辦事年久故也成化二十年取進士三百名存留一百名在各衙門辦事餘皆放回依親讀書已經二次行取除已到選用及見在外尚有四十餘員未到即今在外缺知縣推官共七十餘

員欲將見在二十年舊進士擬除補缺緣係舊年進士  
去年已不選外任俱授京職今見在舊進士比之先授  
京職者辦事聽選又多一年若選外任揆之人情實有  
不堪比之舊例亦不相同合無將二十年見在舊進士  
照例挨次俱除京職將二十三年第三甲新進士除在  
外知縣推官并在內行人待舊進士選盡却將第二甲  
新進士於內外相應員缺內相兼選用所據舊進士除  
已到外其行取不到者似有躲避外選情弊合無除丁

憂事故外其餘無故至今不到以後到部之日俱除外任庶幾銓法無私人心有警緣係斟酌選用新舊進士事理未敢擅便弘治元年閏正月十五日具題當日奉聖旨是欽此

疏通選法奏狀

照得本部見行事例原考中二等該雜職出身未任吏員俱選各處周歲衙門大使副使間或兼選九年衙門職事缺少人多不得疏通即今天下各縣典史共缺二

百餘員例該原考中一等雜職出身并未任從七正八從八正九品告願雜職官員及倉官巡檢該陞正九品考驗不稱降雜官員考選除授其原考二等雜職吏員中間亦有相應之人因不預考選不得除授典史只得守候周歲員缺以此二等雜職往往告稱壅滯而典史員缺却又少人選補合無量為疏通除於例該選典史人員外將在部守選二等雜職吏員考選文移頗通年貌相應者除補典史今後遇有典史員缺照例斟酌多

寡選用庶使二等雜職得以疏通各縣首領不致久缺  
緣係疏通選法事理未敢擅便弘治元年閏正月十七  
日具題十九日奉聖旨是欽此

乞休致奏狀

臣以庸材叨登正統戊辰科進士十有九轉而至今官  
榮幸可謂極矣年已七十有三來日無多寧不懼乎古  
人云知足不辱知止不殆可以長久今臣官已如此年  
已如此若復貪冒持祿固寵人將謂臣何如仰惟陛下

嗣位之初誤聽人言起臣於既退之餘進之以美官付之以重任今已供職將兩月矣其所盡心者不過銓選之常事別無嘉謀嘉猷之敷陳而於保傅之職殊未之盡也焉能滿衆人之望保後日如今日乎矧臣昔在南京之時節次陳乞休致俱蒙先帝厚恩勉留其後不因臣陳乞却令臣致仕相知者皆為臣惜臣亦不能不為之羞愧也今臣已衰朽作止蠢拙陛下雖不厭棄臣自不安儻有人言及之陛下若固留臣則拂言者之意若



令臣去則為臣無窮之羞何若臣今日自求而去之為  
愈乎伏望聖恩憐臣衰老賜之歸田實莫大之慶幸臣  
犬馬之心不獨在於今日為臣子孫者亦當捐生以圖  
報也臣情發於中言不能已無任悚懼之至等因具本  
弘治元年閏正月二十一日奏奉聖旨卿職典銓衡方  
隆委任毋為過慮遽欲退休所辭不允欽此

再乞休致奏狀

臣本陝西民間子弟少遊邑庠從師講學剽竊經籍之

章句叨由科目以發身歷官十有九任食祿四十餘年  
報德無能捫心有愧年踰七十謝事西歸雖居畎畝之  
中不忘君父之恩向蒙聖慈眷念遣使起臣前來命為  
冢宰加以宮保蓋欲臣為國進賢輔成太平臣以衰朽  
受任兩月殊無勞效慮恐向後不為公議所容豈若先  
事求退為愈是以昧死陳乞休致伏奉聖旨卿職典銓  
衡方隆委任毋為過慮遽欲退休所辭不允欽此臣仰  
荷聖旨且感且泣雖殞首捐軀何以報塞萬一但今內

外臣僚未及七十致仕而去者比比今臣七十有三蒼  
顏皓首衰頽無似且乏通變之才無補聖明之治尚在  
班行旅進旅退人雖不言豈能自安伏望聖恩容臣致  
仕庶免後艱非惟不失臣子進退之義抑且克全君父  
始終之恩臣干冒宸嚴無任戰懼之至等因具本弘治  
元年閏正月二十三日奏奉聖旨卿朝廷老臣未可輕  
退宜勉副任用事有當言的盡心來說毋再固辭欽此

王端毅奏議卷七